



Broj: 02-04-2183/22-AP-4
Datum: 02.09.2022. godine

GRADSKO VIJEĆE ZAVIDOVIĆI
n/r PREDSEDAVAJUĆOJ GRADSKOG VIJEĆA
mr. iur. Erna Merdić Smailhodžić

PREDMET: Odgovori na vijećnička pitanja sa 4. sjednice Gradskog
vijeća Zavidovići održane 29.07.2022. godine, dostavljaju se

Povodom vijećničkih pitanja postavljenih na 4. sjednice Gradskog vijeća Zavidovići
održanoj 29.07.2022. godine, dostavljamo odgovore na iste kako slijedi:

1. VIJEĆNIČKA PITANJA VIJEĆNIKA HARISA HODŽIĆ

1. Prvo vijećničko pitanje vijećnika Harisa Hodžić: Vijećničko pitanje, dostavlja se
Na osnovu člana 8. i 87. Poslovnika o radu Gradskog vijeća Zavidovići, kao vijećnik Gradskog
vijeća Zavidovići postavljam sljedeće vijećničko pitanje: Kada će se izvršiti zamjena rasvjetnih
tijela u naseljenom mjestu Dolac a koja nisu u funkciji već nekoliko mjeseci?

Direktno pitanje:

Kada nadležna služba može pokrenuti aktivnosti na zamjeni cca 50 rasvjetnih tijela u
naseljenom mjestu Dolac?

Obrazloženje:

Malobrojni mještani naseljenog mjesta Dolac su prije nešto više od godinu dana dobili
funkcionalnu uličnu rasvjetu koja se prostire u dužini od cca 4 kilometra kroz naseljeno mjesto
i preko 100 rasvjetnih tijela. U periodu od 15 mjeseci skoro pola rasvjetnih tijela nije više u
funkciji a mještani ovog naselja nisu u mogućnosti obezbijediti finansijska sredstva za njihovu
zamjenu. Savjet MZ Dolac, također zbog jako malih prihoda po osnovu redovnih sredstava
koja se uplaćuju od strane općine, nije u mogućnosti finansirati ovako veliki finansijski
poduhvat na zamjeni velikog broja rasvjetnih tijela.

Od nadležnih zahtijevam jasne odgovore u pismenoj formi.

Vijećničko pitanje upućuje se nadležnoj općinskoj službi.

S poštovanjem,

Odgovor na vijećničko pitanje (Odgovor je sačinjen na osnovu akta Službe za upravu
poljoprivrede, vodoprivrede i komunalnih poslova, broj: 08-45-23/22-AP-156 od 22.08.2022.
godine): U narednom periodu, prema raspoloživim sredstvima, planirana je nabavka rasvjetnih
tijela. Po okončanju postupka javne nabavke, a u skladu sa Zakonom o javnim nabavkama
BiH, krenut će se zamjenom rasvjetnih tijela.

2. Treće vijećničko pitanje vijećnika Harisa Hodžić: Na osnovu članova 8. i 87. Poslovnika o radu Općinskog vijeća Zavidovići, kao vijećnik Gradskog vijeća Zavidovići postavljam sljedeće vijećničko pitanje: Tražim od nadležne gradske službe i Komisije za vršenje nadzora nad provođenjem ugovora o podršci projektu zbrinjavanja napuštenih pasa da nam dostave sve zaprimljene finansijske izvještaje azila UG Životinjsko carstvo Arma.

Direktno pitanje:

Tražim nadležne službe i gore navedene Komisije da nam dostavi finansijske izvještaje azila za pse UG Životinjsko carstvo Arma a koje je dostavljeno radi pravdanja utrošenih finansijskih sredstava.

Finansijske izvještaje je potrebno dostaviti svaki mjesec.

Također, uz izvještaj potrebno je dostaviti i datume isplate pravdanih sredstava prema UG Životinjsko carstvo Arma uplaćenih od strane općine Zavidovići.

Od nadležnih zahtijevam jasne odgovore u pisanoj formi.

Vijećničko pitanje upućuje se nadležnoj gradskoj službi, Komisiji za vršenje nadzora nad provođenjem ugovora o podršci projektu zbrinjavanja napuštenih pasa i pasa lotalica u urbanim sredinama općine Zavidovići.

S poštovanjem,

Odgovor na vijećničko pitanje (Odgovor je sačinjen na osnovu akta Službe za upravu poljoprivrede, vodoprivrede i komunalnih poslova, broj: 08-45-23/22-AP-156 od 22.08.2022. godine): Ugovor o podršci projekta zbrinjavanja pasa lotalica sa području grada Zavidovići zaključen je između Gradonačelnika i UG „ŽIVOTINJSKO CARSTVO ARMA“ u mjesecu martu 2022. godine.

Predmetnim Ugovorom UG „ŽIVOTINJSKO CARSTVO ARMA“ preuzelo je obavezu uklanjanja i zbrinjavanja napuštenih i izgubljenih pasa i pasa lotalica sa urbanog područja grada Zavidovići.

Shodno navedenom UG „ŽIVOTINJSKO CARSTVO ARMA“ je dostavilo finansijske izvještaje za mjesec: mart, april, maj, juni i juli.

U prilogi dostavljam izvještaje UG „ŽIVOTINJSKO CARSTVO ARMA“ za sve navedene mjesec.

Što se tiče datuma isplata obavještavamo vas da je:

- za mjesec mart izvršena isplata 21.06.2022. godine u iznosu od 2.000,00 KM,
- za mjesec april izvršena isplata 21.06.2022. godine u iznosu od 2.000,00 KM,
- za mjesec maj izvršena isplata 21.06.2022. godine u iznosu od 2.000,00 KM,
- za mjesec juni izvršena isplata 15.07.2022. godine u iznosu od 2.700,00 KM,
- za mjesec juli još nije izvršena isplata.

3. Četvrto vijećničko pitanje vijećnika Harisa Hodžić: Na osnovu članova 8. i 87. Poslovnika o radu Općinskog vijeća Zavidovići, kao vijećnik Gradskog vijeća Zavidovići postavljam sljedeće vijećničko pitanje: Zašto je tabla (billboard) dobrodošlice na ulazu u Grad Zavidovići iz pravca Maglaj na regionalnom putu R465 postavljena neposredno na skretanju za naseljeno mjesto Uljići umjesto na početak gradske zone?

Direktno pitanje:

Tražim nadležne gradske službe informaciju zašto je se i po kojim kriterijima tabla dobrodošlice na ulazu u Zavidoviće iz pravca Maglaja postavila neposredno u blizini skretanja za naseljeno mjesto Uljići umjesto na lokaciju početka urbane zone (lokacija završetka

industrijske zone i skretanja za Hajderoviće / Pašin Konak) gdje je i do sada bila tabla sa oznakom „ ZAVIDOVIĆI „ , te da li se moguće i koja je procedura da se navedena tabla izmjesti na početak gradske zone?

Obrazloženje:

Određeni broj mještana koji plaćaju naknadu za gradsko zemljište (pripadaju posljednjoj gradskoj zoni) se žali da je administrativna granica gradske zone instalacijom nove table dobrodošlice pomjerena a time oni stavljeni u položaj građana koji žive van gradske zone a u obavezi su plaćati ovu naknadu.

Od nadležnih zahtijevam jasne odgovore u pisanoj formi.
Vijećničko pitanje upućuje se nadležnoj općinskoj službi.
S poštovanjem,

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-10-181/22 od 19.08.2022. godine): Postavljanjem reklamne table / bilborda dobrodošlice ne prejudiciraju se granice urbanog i vanurbanog područja i isti nije povezan sa zakonom predviđenim tablama kojima se označavaju naseljena mjesta. Izbor same lokacije je kombinacija više faktora, kao što su bezbjedna udaljenost od saobraćajnice, vidljivost iz oba pravca kretanja učesnika u saobraćaju, društvena svojina parcele.

Također, ostaje nejasno pitanje plaćanja naknade za gradsko zemljište jer ista ne postoji na području Grada Zavidovići.

2. VIJEĆNIČKA PITANJA VIJEĆNIKA ŠEMSUDINA SKEJIĆ:

1. Vijećnik Šemsudin Skejić:

1.1. Vijećnik Šemsudin Skejić: Pitanje br. 1.1.

Konto 613962 izdaci za izvršenje po sudskim presudama i vansudskim nagodbama Planom budžeta grada za 2022. godinu, izmjene i dopune budžeta grada Zavidovići za 2022. godinu, konto 613962, predviđeni su rashodi i izdaci za izvršenje po pravosnažnim sudskim presudama i vansudskim nagodbama u iznosu od 80.713,15 KM.

Moje pitanje je:

1/ da li je ovaj iznos pokriva sve obaveze po pravosnažnim sudskim presudama i vansudskim nagodbama.

2/ ako ima još obavezujućih presuda i vansudskih nagodbi, koji su to iznosi pojedinačno i da li su sačinjeni planovi otplate?

Smatram da ove aktivnosti treba sporovesti iz prostog razloga što su zatezne kamate dodatni problem kod pravosnažnih presuda i vansudskih nagodbi, u smislu da nisu rijetki slučajevi da zatezne kamate premaše visinu glavnice.

Da bi smo to izbjegli treba da blagovremeno reagujemo kako dodatni troškovi ne bi još više ugrožavali budžet.

Odgovor na vijećničko pitanje (Odgovor je sačinjen na osnovu akta Službe za upravu upravu finansija, budžet i trezor, broj: 05-45-13/22-AP-197 od 22.08.2022. godine):

1. Ovaj iznos ne pokriva trenutno dospjele obaveze, evidentirane kod banke po Spisku evidentiranih rješenja o izvršenju na teret Općine Zavidovići. Izmjenama i dopunama Budžeta grada Zavidovići za 2022. godinu planirano je ukupno 80713,15 KM na transferu 613962

Izdaci za izvršenje po sudskim presudama i vansudskim nagodbama, međutim do 31.05.2022. godine sa transfera izvršeno je bilo 32.183,82 KM, a preostalo je nerealizovanih sredstava 48.529,33 KM.

2. Grad Zavidovići prema spisku banke ima evidentirani obaveza po pravosnažnim i izvršnim presudama i to: NOVI CENTAR DD u iznosu od 73.078,76 KM, S-LIST DOO u iznosu od 5233,78 KM i Selimović Ibrahim u iznosu od 2.400,61 KM.

Iz gore navedenog proizilazi da će se evidentirana obaveze po presudama izvršiti u iznosu od 48.529,33 KM do kraja 2022. godine, te će ostati neizmireni iznos od 32.183,82 KM.

Iz naprijed konstatovanog proizilazi da je trenutno moguće izvršiti dio obaveza po pomenutim trima evidentiranim presudama za izvršenje do iznosa 48.529,33 KM raspoloživih sredstava za ovu namjenu, a namjera Ograna uprave je da ove obaveze maksimalno servisira, upravo zbog zateznih kamata. Plan nam je za „redovni“ rebalans budžeta za novembar - decembar 2022. godine planirati nedostajuća sredstva cca 33.000,00 KM.

1.2. Vijećnik Šemsudin Skejić: Pitanje br.1.2.

Konto 61399133 transfer za regulacione planove i druge prostorno planske dokumente

Postoji li mogućnost i na koji način će biti utrošeno 25.000 KM koje su izmjenama i dopunama budžeta predviđene za izradu regulacionih planova i drugih prostorno planskih dokumenata?

Ovaj transfer je, izmjenama i dopunama budžeta, smanjen sa 50.000 KM na 25.000 KM bez obzira što su sredstva na prihodovnoj strani za ove namjene povećana za više od 100%.

Kako u 2021. godini sredstva za ovu namjenu uopšte nisu korištena (izuzetak je 1.404 KM), postoji opravdana bojazan da će biti i u 2022. godini.

Odgovor na vijećničko pitanje (Odgovor je sačinjen na osnovu akta Službe za upravu geodetskih, imovinskopравnih poslova i urbanizam): Nadležna Služba nije dostavila odgovor.

1.3. Vijećnik Šemsudin Skejić: Pitanje br.1.3.

Konto 613329131 izdaci za javnu rasvjetu, potrošnja električne energije

Kako je moguće da u prvih 5 mjeseci nije bilo aktivnosti na transferu izdaci za javnu rasvjetu – potrošnja električne energije – komunalna naknada?

Odgovor na vijećničko pitanje (Odgovor je sačinjen na osnovu akta Službe za upravu poljoprivrede, vodoprivrede i komunalnih poslova, broj: 08-45-23/22-AP-156 od 22.08.2022. godine): U skladu sa planom Budžeta, izdaci za javnu rasvjetu - potrošnja električne energije su planirani na dva fonda, i to: opći fond i iz fonda komunalnih naknada. Ovakav plan je urađen u skladu sa zakonom i trezorskim poslovanjem i podrazumijeva da se sredstva mogu trošiti tek punjenjem fondova. Obzirom da se opći fond puni tokom cijele godine i u većem iznosu nego fond komunalnih naknada, tako se prvo izvršavaju izdaci planirani da se finansiraju iz općeg fonda, a po prilivu sredstava na osnovu naplate komunalnih naknada bit će izvršeni i izdaci za koje ste postavili pitanje.

1.4. Vijećnik Šemsudin Skejić: Pitanje br. 1.4.

Konto 61372411 i konto 61372421 transferi za tekuće održavanje gradskih i prigradskih ulica transferi za tekuće održavanje lokalnih cesta

Ima li opravdanje što za ova dva transfera u prvih 5 mjeseci nije realizovana niti jedna marka, a uočljivo je da je izmjenama i dopunama budžeta predviđeno povećanje transfera za po 50% ?

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-10-181/22 od 19.08.2022. godine): Putem konta 61372411 finansiraju se izdaci za tekuće održavanje gradskih i prigradskih ulica. Postupak javne nabavke radova „Redovno održavanje gradskih i prigradskih ulica“ u iznosu od cca. 93.000,00 KM pokrenut je 16.03.2022. godine, a Okvirni sporazum sa odabranim ponuđačem sklopljen je 01.06.2022. godine. Prvi ugovor o izvođenju radova u okviru Okvirnog sporazuma potpisan je 27.07.2022. godine prema kome se trenutno izvode radovi održavanja. Iznos od 7.000,00 KM rezervisan je za vršenje stručnog nadzora radova redovnog održavanja.

Putem konta 61372421 finansiraju se izdaci za tekuće održavanje lokalnih cesta. Postupak javne nabavke radova „Redovno održavanje lokalnih cesta“ u iznosu od cca. 93.000,00 KM pokrenut je 16.03.2022. godine, a Okvirni sporazum sa odabranim ponuđačem sklopljen je 16.05.2022. godine. Prvi ugovor o izvođenju radova u okviru Okvirnog sporazuma potpisan je 01.08.2022. godine prema kome se trenutno izvode radovi održavanja. Iznos od 7.000,00 KM rezervisan je za vršenje stručnog nadzora radova redovnog održavanja.

Bitno je napomenuti da su sredstva koja se koriste za ove izdatke namjenska sredstva iz fonda cesta i samo za te namjene se mogu koristiti, tako da je povećanje ovog izdatka u budžetu je rezultat povećanja prihoda od akciza na gorivo, cestarina, naknade za registraciju vozila i sl. i ista se mogu povećavati bez rebalansa budžeta, kao i preraspoređivati na ostala konta kojima je izvor finansiranja fond cesta.

1.5. Vijećnik Šemsudin Skejić: Pitanje br. 1.5.

Konto 61412217 transfer za muški rukometni klub

Da li će muški rukometni klub u preostalih 7 mjeseci dobiti dodatna sredstva ili će transfer od 100.000 KM ostati ukupan transfer za 2022. godinu kako je i planirano?

U najmanju ruku čudno je da se ukupno predviđeni transfer realizuje 100% u prvih 5 mjeseci budžetske godine.

Odgovor na vijećničko pitanje (Odgovor je sačinjen na osnovu akta Službe za upravu društvenih djelatnosti, pitanja boraca i opću upravu): Nadležna Služba nije dostavila odgovor.

1.6. Vijećnik Šemsudin Skejić: Pitanje 1.6.

Konto 6143113 tekući transfer za podršku projektima koji se finansiraju iz drugih izvora

Konto 8216122 kapitalni izdaci – podrška projektima koji se finansiraju iz drugih izvora

Po kojim kriterijumima će biti raspoređena sredstva predviđena za ova 2 transfera ako znamo da smo strategijom integriranog razvoja i planom kapitalnih investicija tačno predvidjeli koji će projekti biti realizovani u iznosu ukupno cca 100.000 KM ?

Ova dva transfera, izmjenama i dopunama budžeta, uvećana su za cca 80.000 KM što je pohvalno i opravdano.

Istovremeno povećanje ovih transfera ne prati dopuna kriterijima kako će tih novih 80.000 KM povećanja biti realizovano.

Vjerovatno po „slobodnom uvjerenju“ i sistemu „ko traži i dobije“.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-10-181/22 od 19.08.2022. godine): Sredstva na kontu 6143113 Tekući transfer za podršku projektima koji se finansiraju iz drugih izvora koriste se kao učešće Grada Zavidovići za sufinansiranje projekata sa raznim partnerskim organizacijama, agencijama, javnim ustanovama ili višim nivoima vlasti i sl., a koji nemaju kapitalni karakter. Do sada je putem ovog transfera sufinansiran projekat Dijaspore PRO sa Fondacijom Mozaik u iznosu od 10.000,00 KM prva tranša, 10.000,00 KM druga tranša koja dopijeva u četvrtom kvartalu i projekat STEM Akademija za digitalno doba sa Razvojnoum agencijoum Zavidovići u iznosu od 27.000,00 KM.

Također, Grad Zavidovići ima potpisan sporazum sa Razvojnoum agencijoum Žepče koji se odnosi na sufinansiranje projekta „3C3NP – tri grada tri parka prirode“ u okviru EU4BusinessREcovery projekta „Za snažnu domaću ekonomiju“ u iznosu od 16.057,36 KM, a čija realizacija je planirana početkom septembra 2022. godine.

Sredstva na kontu 8216122 kapitalni izdaci – podrška projektima koji se finansiraju iz drugih izvora koriste se kao učešće Grada Zavidovići za sufinansiranje projekata sa raznim partnerskim organizacijama, projektima građana, agencijama, javnim ustanovama ili višim nivoima vlasti i sl., a koji imaju kapitalni karakter.

Trenutno je iznos od 50.000,00 KM rezervisan za sufinansiranje projekta sanacije lokalne ceste Zavidovići – Pašin Konak koji je podržan od Vlade Federacije BiH i Zeničko-dobojskog kantona. Iznos od 17.711,40 KM rezervisan je za projekat koji sufinansiraju građani - Asfaltiranje puta prema Brašljevinama. Ostatak sredstava će se koristiti prema dinamici priliva odobrenih sredstava od viših nivoa vlasti.

1.7. Vijećnik Šemsudin Skejić: Pitanje br. 1.7.

Konto: tekući transfer za subvencije privredi i za zapošljavanje

Da li je moguće maksimalno skratiti vrijeme realizacije ovog transfera?

Jedino će tako efekt ovog opravdanog prijedloga povećanja transfera bit ostvaren.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-10-181/22 od 19.08.2022. godine): Tekući transfer za subvencije privredi i za zapošljavanje će biti realizovani do kraja mjeseca augusta, a na osnovu Javnog poziva poduzetnicima / poduzetnicama za dodjelu poticaja privrede na području Grada Zavidovići za 2022. godinu od 19.05.2022. godine. Javni poziv je bio otvoren do 17.06.2022. godine.

1.8. Vijećnik Šemsudin Skejić: Pitanje br. 1.8.

Konto 6152112 kapitalni transfer za sanaciju fasada zgrada kolektivnog stanovanja

Da li je moguće da ovaj iznos bude namjenjen za zgrade koje su obuhvaćene sistemom centralnog grijanja koje realizuje JKP Radnik.

Razlog za to je više nego očigledan.

Na ovaj način utrošak toplotne energije, po svakom rekonstruisanom objektu, bio bi smanjen na 30 – 40 % što je omogućilo smanjenjem troškova u sistemu grijanja.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-10-181/22 od 19.08.2022. godine): Sredstva na kontu 6152112 kapitalni transfer za sanaciju fasada zgrada kolektivnog stanovanja će biti utrošena na osnovu Javnog poziva za sufinansiranje projekata

utopljavanja stambenih objekata kolektivnog stanovanja – stambenih i stambeno-poslovnih zgrada od 20.05.2022. godine.

Cilj javnog poziva je pružanje pomoći vlasnicima etažnih jedinica u objektima kolektivnog stanovanja u poboljšanju energetske efikasnosti zgrada, kao i u ispunjavanju njihove zakonom utvrđene obaveze za finansiranje investicionog održavanja zgrada, čime se sprječava ili otklanja opasnost po život i zdravlje ljudi i obezbjeđuje sigurnost korisnika zgrada i okoline, te doprinosi poboljšanju izgleda grada, manjoj potrošnji energenata, a shodno tome manjoj emisiji štetnih plinova i poboljšanju kvaliteta zraka i života općenito.

Obzirom da se putem javnog poziva dodjeljuju sredstva etažnim vlasnicima za sufinansiranje, Grad Zavidovići je opredjeljenja da svi etažni vlasnici trebaju imati istu mogućnost bez obzira da li se zgrade zagrijavaju putem sistema centralnog grijanja ili ne.

1.9. Vijećnik Šemsudin Skejić: Pitanje br.1.9.

Konto 6154111 i konto 61541111 troškovi za projektovanje, nabavku i realizaciju video nadzora gradskog područja

Da li je moguće obezbijediti, da nadležni za realizaciju ovih važnih projekata poduzme sve što je potrebno kako bi ovaj proces maksimalno ubrzao i realizovao do kraja godine.

Odgovor na vijećničko pitanje (Odgovor je sačinjen od strane Stručne služba gradonačelnika): Grad Zavidovići je izradio Glavni projekat „Gradskog videonadzora“ u decembru 2021. godine, te nakon toga pribavio reviziju Projekta. Glavni projekat obuhvata postavljanje 29 kamera na 24 lokaliteta na području cijelog Grada Zavidovići koji uključuju lokacije na ulazu u Grad Zavidovići iz svih pravaca, kao i raskrsnice u užem dijelu Grada Zavidovići. Neke od navedenih lokacija bit će opremljene kamerama koje vrše kontrolu registarskih tablica. Posljednjih nekoliko godina Budžet općine Zavidovići je planirao iznos od 20.000,00 – 25.000,00 KM za instaliranje videonadzora, koji nije bio dovoljan da se opremi kontrolna porostorija za smještaj opreme za nadzor. Obzirom da finansijska sredstva nisu bila obezbijedena za realizaciju niti jedne faze Gradskog videonadzora, nije pokretnut postupak javne nabavke za izgradnju i instaliranje Gradskog videonadzora. Naime, prema predračunskoj vrijednosti izgradnja Prve faze bi iznosila 81.698,55 KM, izgradnja druge faze bi iznosila 222.372,14 KM i izgradnja treće faze bi iznosila 82.641,82 KM. Izmjenama i dopunama Budžeta Grada Zavidovići za 2022. godinu planirana su sredstva za izgradnju i instaliranje Gradskog videonadzora u iznosu 74.123,15 KM. Navedena sredstva će se koristiti za izgradnju i instaliranje dijela ukupnog projekta Gradskog videonadzora i očekuje se realizacija do kraja 2022. godine. Za izgradnju videonadzora pribavljena je 10.06.2022. godine urbanistička saglasnost, te se provode aktivnosti na rješavanju imovinskopravnih poslova i pribavljanju potrebnih saglasnosti radi izdavanja građevinske dozvole.

1.10. Vijećnik Šemsudin Skejić: Pitanje br. 1.10.

Konto 8212112 izdaci za nabavku poslovnog prostora

Koji će poslovni prostor biti nabavljen u skladu sa sredstvima iz ovog transfera od 29.166,95 KM.

Odgovor na vijećničko pitanje (Odgovor je sačinjen na osnovu akta Službe za upravu geodetskih, imovinskopravnih poslova i urbanizam): Nadležna Služba nije dostavila odgovor.

1.11. Vijećnik Šemsudin Skejić: Pitanje br.1.11.

Konto 82122411 nabavka objekta vodovoda i kanalizacije Zakon o građevinskom zemljištu

Izmjenama i dopunama budžeta, ovaj transfer povećan je sa 18.000 KM na 120.000 KM, pa je logično pitanje šta će za taj uvećani iznos biti nabavljeno.

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-10-181/22 od 19.08.2022. godine): Putem programa utroška sredstava vodnih naknada ZDK za 2022. godinu, Gradu Zavidovići je dodijeljeno 431.258,00 KM za finansiranje sljedećih projekata:

1. Projekat uspostavljanja i zaštite sanitarnih zona izvora Suha,
2. Nabavka i isporuka opreme za upravljanje vodovodnim sistemom,
3. Nabavka i isporuka opreme za DMA zona i mjerenje gubitaka u vodovodnom sistemu,
4. Izgradnja kanalizacione mreže Dubravica,
5. Izgradnja kanalizacione mreže u naselju Podubravlje,
6. Proširenje vodosnabdijevanja naselja Paravci, Marušići i Fojnica,
7. Vodosnabdijevanje prostorne cjeline MZ „Pašin Konak“,
8. Vodovod za naselja Bajvati, Beše i Žioke, MZ „Gostović“,
9. Vodovodni priključak naselja Gornji Sinanovići na vodovod Suha,
10. Vodosnabdijevanje naselja MZ „Rujnica“, I faza i
11. Izgradnja vodovoda Skroze.

Sredstva sa konta 82122411 nabavka objekata vodovoda i kanalizacije Zakon o građevinskom zemljištu u iznosu od 120.000,00 KM će se koristiti za sufinansiranje gore navedenih projekata.

2. Vijećnik Šemsudin Skejić: Set vijećničkih pitanja iz oblasti komunalne higijene Problematika zbrinjavanja komunalnog otpada

I pored toga što je uočen vidan napredak u oblasti zbrinjavanja otpada na cijeloj teritoriji grada Zavidovići, uočeni su brojni nedostaci i pojave koji umanjuju pozitivne efekte novog načina tretiranja otpada sa područja mjesnih zajednica.

Te pojave su:

1. Premda su mnoge divlje deponije očišćene na neke od njih se ponovo gomila smeće,
2. U nekim mjesnim zajednicama, a pogotovo njihovih rubnim područjima još uvijek su netretirane divlje deponije i na njima se i dalje odlaže smeće.

Primjer najmanje 4 divlje deponije u MZ Pašin Konak, lokalitet koji pripada Perovićima.

3. Pored puta uz Krivaju uzvodno od romskog naselja, posebno kod lokaliteta Hadžijina česma, Panorama i dalje vidljivo gomilanje smeća mimo mjesta odlaganja.

Pretpostavljam da je to smeće koje građani ostavljaju izbacivanjem iz auta ili odlaganjem prilikom izlaska iz auta na mjestima odmara i slično.

4. Gomilanje smeća pored kontejnera institucija također je evidentno.

Razlog tome što se ti kontejneri prazne kada predstavnik institucije javi da su napunjeni.

Obzirom da se plaćanje vrši po ispražnjenu kontejnera ekonomičnije je da se kontejner što rjeđe prazi, a time i rjeđe plaća.

To uzrokuje gomilanje smeća pored kontejnera i neugodne mirise za prolaznike i mještane u susjedstvu.

Moja konkretna pitanja su:

1. Čija je nadležnost prikupljanja i odvoza smeća koje su u manjim količinama ali ipak odlaže pored puta uz rijeku Krivaju, a da pri tome to smeće nije odloženo na za to predviđenom mjestu.

Primjer lokacije pored Hadžijine vode na odvojkju puta kod Panorame i mnoge druge lokacije uz put,

2. Kako nadležne gradske službe i javno komunalno preduzeće misle riješiti problem aktiviranja jednom već očišćenih divljih deponija,
3. Koliko vremena će još proteći prije nego se većina divljih deponija očisti prvi puta,
4. Šta treba poduzeti da bi na red došlo čišćenje najudaljenijih divljih deponija za koje znaju samo oni koji ih pune,
5. Da li je izvodljivo pokrivanje video nadzora nekih od mjesta na koja se ilegalno odlaže otpad.

Najbolji odgovor na moje pitanje, između ostalog, bio bi kada bi va pitanja inicirala javno komunalno preduzeće, odgovarajuće stručne službe i nadležne inspekcije da pristupe izradi plana za povećanje efikasnosti na polju zbrinjavanja otpada.

Na kraju ponavljam konstataciju sa početka mog obrazloženja, a to je:

U 2022. godini smo napravili veliki napredak na polju komunalne higijene.

Taj napredak će biti još veći samo ako budemo napravili dobar plan i slijedili ga u potpunosti.

Odgovor na vijećničko pitanje (Odgovor je sačinjen na osnovu akta Službe za upravu poljoprivrede, vodoprivrede i komunalnih poslova, broj: 08-45-23/22-AP-156 od 22.08.2022. godine): Odlukom o komunalnom redu Općine Zavidovići („Službeni glasnik Općine Zavidovići“, broj: 3/2015) definisano je prikupljanje, odvoz i postupanje sa komunalnim otpadom. Istom Odlukom propisane su i kaznene odredbe za one koje nelegalno odlažu bilo kakav otpad. Trenutno ne postoji nadležnost za prikupljanje otpada koje nesavjesni građani ostavljaju pored puta, ali postoje kaznene odredbe kojima će biti sankcionisan onaj koji to djelo i učini. A takav otpad je prikupljan i odvozen na Regionalnu deponiju u ovoj godini kada su čišćene i sanirane 61 divlja deponija na području grada. Dakle, ovdje akcenat treba staviti na one koji nelegalno odlažu otpad a ne na nadležnost za njegovo prikupljanje, jer će se prijavama počinioca nadležnoj komunalnoj inspekciji pokrenuti postupak kažnjavanja. Osim ovoga, a vezano i za jedno od narednih pitanja, angažovanje komunalnih redara koji bi pratili i održavali stanje na terenu, situacija bi u mnogome bila bolja. Ovo je jedan od ciljeva predviđenih Planom upravljanja otpadom Grada Zavidovići 2023-2027. Na isti način bi se mogao riješiti i problem aktiviranja saniranih divljih deponija, kao i stvaranja novih.

Što se tiče trećeg, odnosno četvrtog pitanja, tim koji je formiran ispred Službe za upravu poljoprivrede, vodoprivrede i komunalnih poslova je u proteklom periodu obišao gotovu čitavu teritoriju grada kojoj se moglo pristupiti, i uz saradnju sa Savjetima mjesnih zajednica, formirao evidenciju divljih deponija koje su i bile predmet uklanjanja. Ali u toku samog uklanjanja deponija, dolazile su dodatne prijave o nekim lokacijama koje nisu bile prvobitno prijavljene te nisu ni bile predmet sanacije. Ovdje govorimo o namjenskim sredstvima Ministarstva za prostorno uređenje, promet i komunikacije i zaštitu okoline Zeničko-dobojskog kantona. Grad Zavidovići također u Planu budžeta ima planiranu stavku za ove namjene, tako da će i dalje se nastaviti raditi ove aktivnosti i bit će uklonjene sve deponije za koje se bude znalo i koje bude moguće sanirati. Ovo napominjemo jer su iskustva takva da se u najvećem broju slučajeva radi o liticama ili visokim obalama gdje je jako opasan prilaz i postoji rizik od povreda ako se ručno čisti, a najčešće se tako radi jer teška mehanizacija i nema pristup dok sama ne napravi prilazni put.

Nabavka videonadzora će se planirati u Budžetu Grada u narednoj godini tako da će i to biti jedan od faktora koji bi trebao identifikovati one koji nelegalno odlažu otpad i spriječiti dalje zagađenje, a na postavljenim tablama upozorenja već je navedeno da je prostor pokriven videonadzorom.

3. Vijećnik Šemsudin Skejić: Vijećničko pitanje br. 3 Kašnjenje u dostavljanju, na dnevni red sjednice vijeća, vijećničkih inicijativa i inicijativa udruženja građana

Članom 109 Poslovnika o radu Općinskog vijeća predviđeno je da vijećničke i građanske inicijative uđu u proceduru rješavanja u roku od 30 dana od datuma podnošenja.

Činjenica je da su ti rokovi mnogo duži.

Nerijetko inicijativa ne uđe u proceduru ni za 120 dana od dana upućivanja.

Analizirajući program rada vijeća koji se nalazi na dnevnom redu 4. sjednice gradskog vijeća, nisam mogao zaključiti koliko vijećničkih, a koliko građanskih inicijativa upućeno, a da još nije dospjelo na dnevni red.

Zbog toga postavljam slijedeća pitanje:

3.1. Vijećnik Šemsudin Skejić: *Pitanje prvo:*

Koliko vijećničkih i koliko inicijativa udruženja građana još nisu dospjele na dnevni red vijeća, koje su to inicijative i u kom roku možemo očekivati dostavljanje mišljenja o istim.

Dostavljanjem traženih podataka mogli bi smo lakše planirati kako riješiti kršnjenje u radu po ovoj problematici pa ako treba i promijeniti poslovnik na način da rok od 30 dana povećamo na recimo 60 dana, ali da se držimo poslovnika.

Odgovor na vijećničko pitanje (Odgovor je sačinjen na osnovu akta Stručne službe Gradskog vijeća): Nadležna Služba nije dostavila odgovor.

3.2. Vijećnik Šemsudin Skejić: *Pitanje drugo:*

Kada će zaključci o prihvatanju vijećničkih i inicijativa građana ući u proces praktične realizacije. Svjedoci smo da je broj podnešenih inicijativa, u tekoćem mandatu općinskog gradskog vijeća, prevelik. Nastavimo li ovako, na kraju našeg mandata, taj broj će se mjeriti stotinama. Evidentno je da je broj prihvaćenih inicijativa zabrinjavajući mali. Isto tako može se zaključiti da je veliki broj inicijativa opravdano odbijen. Ovdje govorim o inicijativama koje je vijeće prihvatilo i naložilo da se pristupi njihovoj realizaciji. Stiče se utisak da za veliki broj, od ono malo prihvaćenih inicijativa, realizacija nije ni na pomolu.

Praksa je da su u realizaciji zaključci tzv. „trivijalnih“ inicijativa za koje nisu potrebna finansijska sredstva, niti previše utroška radnog vremena onih koji su zaduženi za realizaciju. Nisam primijetio da je u toku realizacija sveobuhvatnih inicijativa. Najkvalitetniji odgovor na ovo pitanje bio bi: prezentacija plana aktivnosti realizacije zaključaka o prihvatanju vijećničkih i inicijativa udruženja građana.

Odgovor na vijećničko pitanje (Odgovor je sačinjen na osnovu akta Stručne službe Gradskog vijeća): Nadležna Služba nije dostavila odgovor.

4. Vijećnik Šemsudin Skejić: Vijećničko pitanje br.4 vezano za izvod iz regulacionog plana CENTAR II, a koji se odnosi na lokaciju – vlasništvo RK KRIVAJA koja je predmet prodaje

OBRAZLOŽENJE:

Svjedoci smo sve učestalijih prodaja zemljišta na prostoru našeg grada. Trenutno je najaktuelnija prodaja zemljišta u vlasništvu RK KRIVAJA. Za očekivati je da će ova prodaja biti realizovana u skoroj budućnosti. Pri tome će vrijeme pokazati koliko će ta transakcija biti korisna ili promašena investicija. Moje skromno iskustvo govori da udruženja građana nisu kapacitirana da takve transakcije mogu završiti bez negativnih posljedica za društvenu zajednicu. Tako je prva prodaja – licitacija propala vjerovatno samo zbog toga što je depozit

bio 20.000 KM, a ne 10 % početne cijene. Analizirajući izvod iz regulacionog plana CENTAR II, vidljivo je da predmetna lokacija sadrži uglavnom sportske terene (rukomet – mali nogomet, basket i tenis) kao i parking za pravne subjekte u susjedstvu.

Na 3. sjednici gradskog vijeća podnešena je inicijativa koja se odnosi na teniske terene bez kojih bi grad mogao ostati. Ali to nije predmet mog pitanja.

Jasno je da će nakon prodaje ovog lokaliteta doći do promjene regulacionog plana na što se i odnosi moje pitanje.

Da li je izradom novog regulacionog plana moguće riješiti problem parking prostora za pravna i fizička lica, sadašnje i buduće korisnike.

Ako je to ikako moguće, to treba omogućiti tokom promjene regulacionog plana CENTAR II ili eventualno izrade Urbanističkog plana grada.

Odgovor na vijećničko pitanje (Odgovor je sačinjen na osnovu akta Službe za upravu geodetskih, imovinskopravnih poslova i urbanizam): Nadležna Služba nije dostavila odgovor.

3. VIJEĆNIČKA PITANJA VIJEĆNIKA SAMIRA SKEJIĆ

1. Vijećnik Samir Skejić: Pitanje za nadležnu gradsku službu:

Obzirom da su četiri vijećnika OV/GV-a u 2021. godini istupili iz članstva u parlamentarnim strankama zanima me kakav je pravni status novčanih sredstava iz parlamentarnog fonda u kojem su trebal participirati i navedeni vijećnici i kako je pravno riješen utrošak ovog dijela sredstava koji po slovu zakona pripada navedenim vijećnicima.

Odgovor na vijećničko pitanje (Odgovor je sačinjen na osnovu akta Stručne službe Gradskog vijeća): Nadležna Služba nije dostavila odgovor.

2. Vijećnik Samir Skejić: Zašto se odgovori na vijećnička pitanja dostavljaju u posljednji ili pretposljednji dan uoči sjednice vijeća?

Odgovor na vijećničko pitanje (Odgovor je sačinjen od strane Stručne službe gradonačelnika): Zbog kratkog vremenskog prioda od dostavljanja vijećničkih pitanja u pisanoj formi Gradonačelniku i potrebnog vremena za pripremu odgovora na vijećnička pitanja, odgovori bivaju dostavljani vijećnicima Gradskog vijeća Zavidovići nakon dostave materijala koji se razmatrju na narednoj sjednici Gradskog vijeća. Bez obzira na navedeno gradske službe će uložiti trud da odgovori na vijećnička pitanja u narednom periodu budu dostavljana uz materijale za sjednicu Gradskog vijeća Zavidovići.

3. Vijećnik Samir Skejić: Zašto se na ljekare Doma zdravlja vrši izravan uticaj od strane Načelnika da revidiraju pravo na bolovanje nekim uposlenicima gradske službe i uposlenicima Općine? Dopis o potrebi revizije poslan na adresu svih ordinirajućih ljekara.

Odgovor na vijećničko pitanje (Odgovor je sačinjen od strane Stručne službe gradonačelnika): Navedenim aktom Gradonačelnika nije vršen pritisak na ordinirajuće ljekare u postupku odobravanja odsustva sa posla zbog bolesti za zaposlene u organima Grada Zavidovići, nego je ukazano na potrebu dodatne pažnje prilikom odobravanja odsustva sa posla zbog bolesti, a zbog pojava i činjenica koje upućuju na drugačiji zaključak o zdravstvenom stanju.

4. Vijećnik Samir Skejić: Budući da je bilo dosta pitanja, nisam zadovoljan skoro pa ni na jedno pitanje. Pa bih molio da se ta i odgovori na nekoj narednoj sjednici malo upotpune. Prije

svoga nisam zadovoljan odgovorima koji su nam prispjeli iz Doma zdravlja, ne trebate nas uvjeravati da se na konkursima ne može napraviti razlika između diplome učenika školovanog u vanrednom i redovnom režimu postoje strahovite razlike u diplomama i vide se na prvi pogled. Jedno od pitanja bilo je upućeno Načelniku, nisam zadovoljan izvještajem o utrošku sredstava u podružnici Perovići budući da je pitanje samo polovično opservirano. Nisam dobio odgovor na najpikantniji detalj, a tiče se koliko je novca uloženo u putnu infrastrukturu u podružnicu Peroviće, a koliko u pojedini rad našeg domaćinstva. Ovaj drugi dio pitanja ostao je ne tretiran. Zaista mi je žao da načelnika nema ovde, nadam se da će se pojaviti. Hvala vam.

Odgovor na dopunsko vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju): Nadležna Služba nije dostavila odgovor.

4. VIJEĆNIČKA PITANJA VIJEĆNIKA ŠEMSE FEHRIĆ

1. Vijećnik Šemso Fehrić: U skladu sa članom 89. Poslovnika o radu OV Zavidovići, postavljam vijećničko pitanje: Kada će sanirati raskrsnica ulica Podubravlje i Dubravački put? Činjenica je da 18 godina prelazimo preko istih rupa, a ništa se nije poduzelo.

Odgovor na dopunsko vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-10-181/22 od 19.08.2022. godine): Sanacija raskrsnice ulica Podubravlje i Dubravački put je u toku.

2. Vijećnik Šemso Fehrić: Kada će se riješiti klizište na lokalnom putu Zavidovići – Stavci – Gornji Kovači, u mjestu Kratkovići?

Odgovor na vijećničko pitanje (Odgovor je sačinjen na osnovu akta Službe za upravu privrede, lokalni razvoj, infrastrukturu i međunarodnu saradnju, broj: 03-45-10-181/22 od 19.08.2022. godine): Ranijom ograničenom intervencijom Grada Zavidovići zaustavljeno je klizište „Kratkovići“ na lokalnom putu Zavidovići – Gornji Kovači.

Trenutna situacija na terenu ukazuje na to da je klizište stabilno i da nema pomjerenja tla.

Kompletna sanacija klizišta iziskuje velike troškove, a Grad Zavidovići trenutno nema raspoloživa sredstva za ove namjene.

Također, bitno za napomenuti je da na području Grada Zavidovići postoji preko 300 registrovanih klizišta te je veoma teško odrediti prioritete u odnosu na finansijska sredstva kojima Grad raspolaže.

3. Vijećnik Šemso Fehrić: Da li će se održati manifestacija „Ljeto u gradu“ ove godine? Ako neće zašto neće, ako već imaju namjenska sredstva za te namjene?

Odgovor na vijećničko pitanje (Odgovor je sačinjen na osnovu akta Službe za upravu društvenih djelatnosti, pitanja boraca i opću upravu): Nadležna Služba nije dostavila odgovor.

5. VIJEĆNIČKO PITANJE VIJEĆNIKA ADMIRA FOJNICE

Vijećnik Admir Fojnica: Poštovani/a,

Na osnovu članova 8. i 87. Poslovnika o radu Gradskog vijeća Zavidovići, kao vijećnik Gradskog vijeća postavljam vijećničko pitanje.

OBRAZLOŽENJE:

Na šestoj redovnoj sjednici Općinskog vijeća podnio sam Inicijativu za oslobađanje plaćanja taksi pri izgradnji prvog objekta individualnog stanovanja za malde bračne parove do 35 godina starosne dobi.

Tražim odgovor u pisanoj formi, zašto tako jedna bitna Inicijativa za naše mlade nikad nije obrađena i dostavljena na neku od sjednica Općinskog vijeća, vijećnicima na razmatranje i izjašnjavanje po istoj.

Odgovor na vijećničko pitanje (Odgovor je sačinjen na osnovu akta Službe za upravu geodetskih, imovinskopravnih poslova i urbanizam): Nadležna Služba nije dostavila odgovor.

6. VIJEĆNIČKO PITANJE VIJEĆNIKA HAKIJE OSMIĆ

Vijećnik Hakija Osmić: Uvaženo predsjedništvo, gospodina načelnika nema, kolegice i kolege vijećnici, gosti ,uvaženi mediji, sve vas srdačno pozdravljam i selamim. Ja ću postaviti jedno vijećničko pitanje, a odnosi se na sanaciju klizišta u mjestu, naseljenom mjestu Keseri. Naime postavljam pitanjem gradonačelniku i nadležnim službama zašto do sada ništa nisu poduzeli po tom pitanju sanacije klizišta u naseljenom mjestu Keseri, a koje povezuje nekoliko naseljenih mjesta kao što su dalji odvojak a prema Livadama, prema Delićima, prema Lazu, Pašinu Konaku i tako dalje Huskićima. Gdje su mještani evo maltene bukvalno evo ne u sto postotnom procentu odsječeni od tih naselja, odnosno korištenja i svog naselja u zadnje dvije godine to klizište se pojavilo i oni su riješili to privremeno na način da su zahvatili parcelu susjednu, privatnu parcelu i koriste tu komunikaciju evo, ovaj na nekakvu riječ dok se ne riješi ovo pitanje sanacije klizišta pa evo molim načelnika, i nadležne službe da ovo pitanje ozbiljno shvate i da ga pokušaju što prije riješiti. Hvala.

Odgovor na vijećničko pitanje (Odgovor je sačinjen na osnovu akta Službe za upravu civilne zaštite, broj: 07-45-22-200/22 od 17.08.2022. godine): Grad Zavidovići je pokrenuo proceduru zaključivanja okvirnog sporazuma za sanaciju šteta nastalih djelovanjem prirodnih i drugih nesreća, među koje spadaju i klizišta. Tenderska procedura je u završnoj fazi, i čim se ista u potpunosti okonča krenut će se u plansku sanaciju kako klizišta, tako i drugih šteta nastalih djelovanjem prirodnih nesreća.

S poštovanjem

PO OVLAŠTENJU GRADONAČELNIKA
broj: 02-45-9/22-AP-41 od 22.04.2022. godine
SEKRETAR GRADSKOG ORGANA
DRŽAVNE SLUŽBE

Dostavljeno:

1. Naslovu,
2. U spis.

Nermin Čahtarević, dipl. pravnik